

Mantegnair la cumpetitivitad da la Svizra

Il survegliader dals pretschs fa squitsch

DA LUCAS DEPLAZES / ANR

■ **L'onn passà ha prendì il survegliader dals pretschs en il visier ils divers servetschs publics e procurà per correcturas en favur dals consumers dad almain 324 milliuns francs. En vista a la dismessa dal curs da stgomi fix dal franc svizzer saja impurtant da dar vivanant las reduziuns dals pretschs da l'import per mantegnair la cumpetitivitad da la Svizra.** Sco quai che ha punctuà *Stefan Meierhans*, il survegliader dals pretschs, a chaschun da sia conferenza da medias a Berna, èn stads en il focus l'onn passà ils pretschs dals servetschs publics. Cun La Posta ha el realisà reduziuns ed avantatgs en la summa da 280 milliuns francs. Sin il sector dal traffic public ha Meierhans cuntanschì reduziuns da var 29 milliuns francs. Reduziuns da las tariffas en la summa da var 15 milliuns francs ha el cuntanschì tar ils furniturs da gas. Cun exempels concrets ha Meier-

hans demussà che la Svizra porscha sin il sector da l'electronica pretschs pli bas che sur cunfins.

Tariffas dals ospitals

Per Meierhans laschian confederaziun e dretgiras memia bler libertad als chantuns per fixar las tariffas per il tractament en ils ospitals. El ha constatà ch'ils chantuns mettian magari lur interess sur quels dals singuls paja-premias. Qua stuess la politica far dapli squitsch en favur dals burgais. In potenzial da spargn ha Meierhans erui sin il sectur dals medicaments nua ch'ils pretschs per ils medicaments dal cor e da la circulaziun dal sang sajan en cumparaziun cun l'exteriur memia auts. Basegn d'agir datti er areguard ils pretschs excessivs per generica en Svizra, ha criticat Meierhans.

Il ferm franc svizzer

En vista al ferm franc svizzer spetga il survegliader dals pretschs ch'ils impor-



Il survegliader da pretschs Stefan Meierhans ha examinà principalmain l'onn passà ils pretschs dals servetschs publics.

KEYSTONE

Statistica 2014

L'onn 2014 ha il survegliader dals pretschs tractà 1853 reclamaziuns dal pievel svizzer. La pli gronda part da las reclamaziuns ha pertutgà il sector da la sanadad publica (13%). Il segund sector da critica è stà la telecomunicaziun. Bleras reclamaziuns èn vegnidas pervia dals pretschs da las brevs e dals pachets. Savens han reclamà ils clients pervia da las tariffas dal traffic public. Concret ha il survegliader dals pretschs realisà sin il sector dals servetschs publics reduziuns en favur dals consumers en la summa da 324 milliuns

francs. Il survegliader dals pretschs ha cuntanschì l'onn passà 14 novas schliaziuns da concordanza cun diversas instituziuns, principalmain cun manaschis da combustiu da rument, Salinas dal Rein e controlla da la duana. Las instituziuns publicas han sutmess al survegliader dals pretschs per examinaziun 421 projects. Meierhans ha elavurà 72 recumandaziuns davart pretschs e tariffas en il sector da la sanadad, areguard las tariffas per las auas e per las auas persas e per l'allontanament dal rument.

turs dettian immediat vivanant ils avantatgs da l'import da rauba. Tenor sias emprimas constataziuns succedia quai actualmain dentant meglier che l'onn 2011. Per ina conclusiun generala saja il temp anc memia curt. En la situaziun actuala saja da gronda impurtanza che

las reduziuns realisadas tar l'import da products vegnian dadas vivanant senza retard per uschia pudair mantegnair la cumpetitivitad da l'economia svizra. Tar ils secturs da cuminanza spetga Meierhans la duida prudentscha tar la fixaziun da las taxas e tariffas per lur ser-

vetschs u da schizunt reducir las taglias per pudair restar cumpetitiv envers l'exteriur. Meierhans recumonda da mantegnair il princip da «Cassis-de-Dijon» per l'import da victualias e spera ch'il parlament saja ussa pront da reveder la lescha davart ils cartels.